

point leurs ennemis quand ils les peuvent vaincre , leur abbatans la teste pour avoir leur peau & chevelure laquelle à leur retour à la maison ils eslevent comme par forme de trophée : ils espargent les femmes & enfans & les nourrissent & entretiennent. A leur retour de la guerre ils appellent tous leurs sujets, & les festoyent & font bonne chere l'espace de trois iours & trois vicés avec chançons & danfes.

Leur religion & Prestres.

Ils baillent es mains des Vieilles femmes qu'ils ont la peau & chevelure de leurs ennemis, & les contraignent de danser & chanter hymnes au Soleil comme le tenans autheur de leur victoire. Ils adorent le Soleil & la Lune comme font les autres Americains. Ils respectent fort leurs Prestres & leur adioustent foy pource qu'ils sont grands devins, forciers & enchanteurs: Ils leur servent aussi de Medecins & Chirurgiens, portans tousiours quant & eux un sac avec herbes medecinales pour guerier les malades qui pour la plupart sont malades de Vairole : car ils sont fort chauds & Veneriens, & appellent les femmes & filles enfans du Soleil. Chacun a sa propre femme hormis le Roy, à qui il est permis d'en avoir deux ou trois, à condition que la premiere espousee sera honoree par dessus les autres & tenue seule pour Royne, & leurs enfans seuls declarez heritiers de leurs biens, & successeurs du gouvernement. Les femmes ont soing du mesnage, & estans enceintes ne sont plus cognues de leurs maris, lesquels ne mangent rien de ce quelles ont attouché durant le temps de leur maladie. Il se trouve en ce pays là plusieurs Hermaphrodites de nature masculine & feminine lesquels on employe a besoigner, & aussi a porter les munitions & provisions de guerre. Ceux ci peignent leur visage & portent en leurs cheveux des plumes d'oiseau, afin de paroistre tant plus redoutables.

Leur nourriture & provision.

Leur provision est de pain & de farine de Maiz, & du Miel. Ils rostissent leur farine pour le contregarder tant plus long temps: & font aussi par fois porter quant & eux des poissons secs rostis. En temps de famine ils mangent beaucoup d'immondicitez, meslans du sable & des charbons parmi leur farine. Allans à la guerre le Roy marche le premier, tenant un dard de l'une de ses mains, & de l'autre un arc, & portant autour de ses espauls une trouffe avec des fleches, & les autres suivent avec leurs arcs portans leurs fleches en leurs cheveux ou en leurs trouffes. A l'approche, & au livrer de la bataille ils iettent des crix espouvantables selon la coutume des autres Barbares, Turcs & Tartares. Ils n'entreprennent point de guerre sans preallable Conseil General, auquel effect ils s'assemblent tous les matins: & est leur assemblée en forme de croissant ou demi Lune autour de leur Roy, lequel sied au milieu sur une chaire environné des autres des deux costez, & est la chaire faite de neuf rondes pieces de bois: là tous le viennent saluer en grande reverence & honneur commençans depuis le plus vieil qui eslevant ses mains sur sa teste s'escrie: Ha, he, ya, ha, ha, à quoy les autres respondent, Ha, ha. Ceste salutation achevee chacun s'assied sur son banc: & advenant qu'on ait a traiter de quelque affaire d'importance le Roy fait appeller les Prestres lesquels ils nomment Iavas, & les Anciens, demandant à un chacun d'eux leur advis. Cependant le Roy commande à certaines femmes qu'elles ayent à luy preparer le Casmam, qui est un breuvage fait du jus de certaines fueilles, lequel estant bouilli devient clair: puis se presente l'Eschanfon eslevant ses mains en haut pour luy donner la benediction, & aux assistans qui pareillement doivent boire, puis prenant le breuvage le verse tout chaud dans une coupe de narcle de perle & le presente premierement au Roy puis par

Reverence qu'ils portent à leur Roy.

son